

# 魚腸劍

中華書局印行





A541 212 0020 8617B

# 小小說例言

一 本書文字淺顯，材料活潑，取名爲小小說，凡是已通文字的人，固然可以用牠做消遣品，就是略解字義的人閱讀本書，也可以幫助他走上了通文的捷徑。所以本書不論在小學教育、民衆教育和家庭教育各方面，作爲國語文的補助讀物，都很適宜。

本書根據各種舊小說編成，取材都是最富有興趣的，並且每種都有一個不同的封面，繪成彩圖，鮮明悅目，尤其可以助人興味。

舊小說向來爲社會上所歡迎，不過在故事的本身上，或者有傷風化的地方，本書對於這種材料，一概刪去；在文字上，或者有原文太深，和鄙俗不堪的，本書便重加改作，使讀者既容易領悟，且不被惡劣的文字所同化。

本書每寫一段故事，只取應敘的事實，其餘繁文枝節，完全刪去；至文字分段另行排列，目的是要使閱讀時容易醒目。

本書用三號字排印，行款疏朗，絕對沒有字迹模糊，損傷目力的弊病；小本精裝，攜帶也很便利。



魚腸劍

話說吳國公子光。本應繼吳王諸樊之後。不意爲王僚所奪。自立爲王。公子光力不能爭。祇好退守臣位。然心中甚是不服。陰懷殺僚之心。而王僚不覺也。公子光善於用兵。王僚用之爲將。竊喜兵權在手。謀之較易。乃求善相者曰。被離。舉爲吳市吏。囑以訪求豪傑。引爲己助。一日楚國亡。臣伍員字子胥。正在吳市

吹簫乞食。被離聞簫聲甚哀。出見子胥。大驚曰。吾相人多矣。未見有如此之貌也。乃揖而進之。請其上座。子胥謙讓不敢。被離曰。吾聞楚王殺忠臣伍奢。其子子胥。出亡在外。子殆是乎。子胥不敢對。被離又曰。吾非禍子者。吾見子狀貌非常。欲爲子求富貴地耳。子胥乃以實告。早有人知其事。報知王僚。僚召被離。引子胥入見。被離一面使人報公子光。得知。一面使子胥沐浴更衣。一同進謁王僚。僚奇其貌。與之語。知其

賢卽拜爲大夫之職。次日子胥入謝道及父兄之冤。咬牙切齒。王僚憐之。許爲興師復仇。公子光素聞子胥智勇出衆。有心收爲己用。聞先謁王僚。恐爲僚所信任。乃入見王僚曰。光聞楚之亡。臣伍員來奔我國。王以爲何如人。僚曰。賢而且孝。光曰。何以見之。僚曰。勇壯非常。與寡人謀國事。無不中竅。是其賢也。父兄之冤。刻不忘報。是其孝也。光曰。王許其復仇乎。僚曰。寡人憐其情。已許之矣。光諫曰。吳楚爭兵已久。未見

大勝。若爲伍員興師。是匹夫之恨。重於國恥也。勝則彼快其憤。不勝則我受其辱。必不可。王僚以爲然。遂罷伐楚之議。子胥聞之曰。公子光方有內志。未可說以外事也。乃辭大夫之職不受。光復言於王僚曰。伍員以王不肯興師。辭職不受。有怨望之心矣。必不可。用僚。遂疎子胥。聽其自去。但賜以陽山之田百畝。子胥乃耕於陽山之野。公子光私往見之。贈以布帛米粟。深相結納。問曰。子出入吳楚之境。遇有才勇之士。

如子者乎。子胥曰。臣何足道。所見吳國有專諸者。真勇士也。公子光曰。何如。子胥曰。前者臣初至吳境。見一壯士。與大漢厮打。衆人力勸不止。門內有一婦人喚曰。專諸不可。其人似有畏懼之狀。卽時斂手入門。臣深怪之。問於旁人曰。如此壯士而畏婦人乎。旁人告曰。此吾鄉勇士。力敵萬人。不畏強禦。適纔門內喚聲。乃其母也。所喚專諸。卽此人。姓名專諸。素有孝心。事母無違。雖當盛怒。聞母至。卽止。臣心慕此人。曾訪

諸其家。誠心結好。專諸入告其母。乃結爲生死之交。公子欲求才勇之士。專諸是矣。光曰。願因子得交於專先生。乃與子胥同車直造專諸之家。子胥指公子光曰。此吳國長公子。久慕吾弟英雄。特來拜訪。弟不可辭。專諸曰。諸里巷小民。何德何能。敢煩大駕。遂揖公子光而進。公子光先拜。致生平相慕之意。專諸答拜。光奉上金帛爲贄。專諸再三謙讓。子胥從旁力勸。方纔肯受。自此公子光使人日饋米肉。月給布帛。又



不時存問其母。專諸甚感其意。一日問光曰。諸村野細民。蒙公子厚恩。無以爲報。倘有差遣。無不從命。光乃退去左右。密告以欲刺王僚之事。專諸曰。久受大德。本當圖報。但有老母在堂。未敢以死相許。光曰。吾亦知之。爾母老子幼。然非爾無可相與圖事者。苟成其事。君之母卽吾之母。君之子卽吾之子。自當盡心事養。豈敢有負於君哉。專諸沈思良久。對曰。凡事輕舉無功。必謀萬全。欲刺王僚。必先投王所好。方能近

王之身。不知王有何好。光曰。好味。味中尤好魚炙。專諸曰。諸請暫辭。光曰。爾將何往。專諸曰。往學烹魚。爲近吳王計耳。專諸遂往太湖邊學炙魚。閱三月。食其魚者。皆以爲美。然後復往見公子光。光乃藏專諸於府中。召伍子胥謂之曰。專諸學炙魚已精其味。何以得近吳王。子胥曰。譬如鴻鵠。所以不可制者。以其有羽翼耳。欲制鴻鵠。必先去其羽翼。吾聞王公子慶忌。手能格飛鳥。走能及奔馬。筋骨如鐵。萬夫不當。其母

弟掩餘燭庸二人。並握兵權。雖有擒龍殺虎之勇。鬼神不測之謀。安能濟事。公子欲除王僚。必先去此三子。然後大事可圖。不然。幸而成事。公子能安然在位乎。公子光俯思半晌。起曰。君言是也。君且歸田。俟有機會。再當相議耳。子胥乃辭去。其時楚平王得心疾而死。子胥聞之。搥胸大哭。終日不止。人怪而問曰。楚王乃子之仇人。今聞其死。正當快心。何反哭之。子胥曰。我非哭楚王也。恨吾不能斬彼之頭。食彼之肉。以

雪此恨。使彼得善終耳。子胥愈想愈恨。一連三夜無眠。心中想出一計。來見公子光。曰。公子欲行大事。何竟無間可乘耶。光曰。晝夜思之。未得其便。子胥曰。今楚王新歿。朝無良臣。公子何不奏過吳王。乘楚喪亂之中。發兵南伐。可以圖霸。光曰。倘遣吾爲將。奈何。子胥曰。公子可詐爲墮車而得足疾者。王必不遣。然後薦掩餘燭庸爲將。更使公子慶忌。結連鄭衛兩國之兵。共攻楚國。此一網而除三翼。吳王之死期至矣。公

子光不覺下拜曰。吾得子胥。乃天賜也。次日。以乘喪伐楚之利。入言於王僚。僚欣然聽之。光曰。此事本來臣當效勞。奈因墮車傷足。方就醫治。不能任勞。僚曰。掩餘燭庸可乎。光曰。得人矣。光又曰。小國之附楚者尚多。若遣公子慶忌。往連鄭衛之兵。并力攻楚。可獲大勝。王僚大喜。卽命掩餘燭庸帥師伐楚。却不遣公子慶忌。掩餘燭庸引師二萬。水陸並進。楚人聞之。亦起水陸兩師相禦。數月之間。吳師未能取勝。公子光

進言曰。楚兵尙強。掩餘燭庸。日久無功。臣向欲連鄭  
衛之兵。正爲此也。今日遣之。尙未爲晚。王僚乃使慶  
忌。糾合鄭衛之兵攻楚。是時王僚手下親信諸人。俱  
已調開。單留公子光在國。伍子胥乃謂光曰。公子曾  
覓得利劍乎。欲用專諸。此其時矣。光曰。先君賜我一  
劍。名魚腸。形雖短狹。砍鐵如泥。遂出劍以示子胥。子  
胥誇獎不已。卽召專諸。以劍付之。專諸不待開言。已  
知公子之意。慨然曰。王信可殺也。但生死之際。不敢

自主。俟稟過老母。方敢從命。光曰善。專諸歸視其母。不言而泣。母曰。兒今日何悲也。豈公子欲用汝耶。吾舉家受公子厚恩。大德當報。忠孝豈能兩全。汝速往。勿以我爲念。汝能成人之事。垂名後世。我死亦不朽矣。專諸猶依依不舍。母曰。吾思飲清泉。可於河下取之。專諸奉命取泉於河。比及回家。不見老母在堂。問其妻。妻對曰。姑適言困倦。閉戶思臥。戒勿驚之。專諸心疑。啟牖而入。則老母已自縊於床上矣。專諸痛哭。

一場收拾殯葬。來見公子光。言母死之事。光十分過意不去。安慰一番。然後復論及王僚之事。專諸曰。公子何不設宴以請吳王。王若肯來。事八九濟矣。光從之。入見王僚曰。有庖人從太湖來。新學炙魚。味甚鮮美。請王辱臨下舍而嘗之。王僚生平最好炙魚。遂欣然許諾。曰。來日當至王兄府上。不必過費。光是夜預伏甲士於窟室之中。再命子胥暗約死士百人。在外接應。於是大張飲具。次早復請王僚。僚入宮。告其母。



曰。公子光具酒相邀。得毋有他謀乎。母曰。不去則生  
閒隙。若嚴爲之備。又何懼哉。王僚於是被甲三重。陳  
設衛兵。自王宮起。直至光家之門。街衢皆滿。接連不  
斷。僚駕及門。光迎入拜見。既入席。光侍坐於旁。僚之  
親近。布滿堂階。庖人獻饌。皆從庭下搜檢更衣。然後  
膝行而前。光上觴致敬。忽作痛苦之狀。乃前奏曰。光  
足疾舉發。痛徹心髓。必用大帛纏緊。其痛方止。幸王  
寬坐須臾。容裹足便出。一步一躓。入內去了。少頃。專

諸告進魚炙。搜檢如前。誰知這口魚腸短劍。已暗藏於魚腹之中。專諸膝行至前。用手擘魚以進。忽地抽出短劍。直刺王僚之胸。十分之重。貫過三層堅甲。透出背脊。王僚大叫一聲。登時氣絕。侍衛力士一齊擁上。刀戟並舉。當將專諸砍做肉醬。堂中大亂。公子光在窟室中。知事已成。乃縱甲士殺出。僚衆一半被殺。一半奔逃。其所設軍衛。俱被子胥引衆殺散。卽奉公子光升車入朝。聚集羣臣。將王僚背約自立之罪。宣

佈國人。今日非光貪位。實王僚之不義也。於是公子光手下一班臣子。均請卽位。公子光乃卽吳王之位。自號闔閭。收拾王僚屍首。殯葬如禮。又厚葬專諸。封其子專毅爲上卿。封伍子胥爲行人之職。待以客禮。而不臣。相者被離。舉薦子胥有功。亦升大夫之職。散財發粟。以振窮民。國人安之。掩餘燭庸。聞得此事。皆棄去軍馬。投奔他國去了。惟公子慶忌逃奔在外。招納死士。結連隣國。意欲伐吳報仇。吳王闔閭聞其謀。

謂子胥曰。昔專諸之事。寡人全得子力。今慶忌有謀。吳之心。寡人食不甘味。坐不安席。慶忌若存。猶王僚之未死也。若更有專諸其人者。事可了矣。子胥曰。臣向時所厚有一細人。似可與謀。闔閭曰。慶忌力敵萬人。豈細人所能勝任哉。子胥對曰。是雖細人。實具萬人之勇。闔閭曰。其人爲誰。子何以知其勇。試爲寡人言之。子胥曰。其人姓要。名離。吳人也。臣昔見其折辱壯士於座上。壯士含愧出席而去。要離至晚還家。謂

其妻曰。我今日於大庭廣衆之間。面辱一壯士。今夜必來殺我。以洩其憤。我當僵臥室中。以待其來。慎勿閉門。那壯士果於夜半挾利刃。逕造要離之家。見門扉不掩。堂戶大開。直趨其室。見一人垂手散髮。臨窗僵臥。視之。乃要離也。壯士以劍承要離之頸。數之曰。汝有當死者三。汝知之乎。離曰。不知也。壯士曰。汝辱我於衆人之前。一死也。歸不閉門。二死也。見我而不起避。三死也。汝自求死。勿以我爲怨。要離曰。我無三

死之過。爾有三不肖之愧。爾知之乎。壯士曰。不知。要離曰。吾辱爾於衆人之前。爾不敢出一言。一不肖也。入門不咳。登堂無聲。有掩襲之心。二不肖也。以劍承吾之頸。尙敢大言。三不肖也。爾有三不肖。而反責我。不亦鄙哉。壯士乃收劍。嘆曰。吾之勇。自計世人莫有及者。要離乃出。吾之上。真天下之勇士矣。吾若殺之。豈不貽笑於人。乃投劍於地。以頭觸柱而死。方其在席之時。臣亦在座。故知其詳。若要離者。豈非有萬人

之勇乎。闔閭曰：是又一專諸矣。子可爲我召之。子胥乃往見要離。曰：吳王久慕吾子高義，欲一見顏色。特來勸駕，請卽同行。離驚曰：吾乃吳下小民，身無寸長，不敢奉命。子胥再三相勸，並申吳王殷殷欲見之誠。萬勿固辭。要離乃隨子胥入謁。闔閭初聞子胥誇張要離之勇，意必狀貌魁偉，不同常人。及見離身材僅五尺餘，腰大一束，形容醜陋，大失所望。心中不悅，問曰：子胥稱勇士要離，乃子乎？離曰：臣小細無力，迎風

則伏。負風則僵。何勇之有。然大王有所遣。不敢不盡力。闔閭默然不言。子胥已知其意。奏曰。要離形貌醜陋。其智術非常。非此人不能成事。王勿失之。闔閭乃延入後宮。賜坐。要離進曰。大王意中所患。得非亡王之公子乎。臣能近慶忌。刺之如割雞耳。闔閭曰。慶忌明智之人。豈有輕信國中之客而近子哉。要離曰。慶忌招納亡命。將以害吳。願王戮臣妻子。斷臣右手。臣訴以負罪出奔。慶忌必信臣。而臣可以近慶忌矣。闔



闔愀然不樂曰。子無罪。吾何忍出此。要離曰。臣聞安  
妻子之樂。不盡事君之義。非忠也。懷室家之安。不能  
除君之患。非義也。臣得以忠義成名。雖舉家就死。其  
甘如飴矣。闔閭許之。次日。子胥同要離入朝。子胥薦  
要離爲將。請兵伐楚。闔閭罵曰。寡人觀要離之力。不  
及一小兒。何能勝伐楚之任哉。况寡人國事粗定。豈  
堪用兵。要離進曰。不仁哉。王也。子胥爲王定吳國。王  
乃不許。子胥報仇乎。闔閭大怒曰。此國家大事。豈汝

野人所知。况汝乃新進小臣。敢當朝責辱寡人。狂悖已極。呼力士執要離。斷其右臂。囚於獄中。再遣人收其妻子。羣臣嘆息而出。皆不知其由。過了數日。子胥密諭獄吏。寬要離之禁。要離乃乘間逃出。闔閭遂戮其妻子。焚棄於市。要離奔出吳境。一路上逢人訴冤。訪得慶忌在衛。遂至衛國求見。慶忌疑而不納。要離乃脫衣示之。慶忌見其右臂果斷。方信爲實。乃問曰。吳王旣殺汝妻子。刑汝之軀。今來見我。意欲何爲。離

曰。臣聞吳王殺公子之父。而奪大位。今公子連結諸侯。將有復仇之舉。故臣以殘命相報。臣能知吳國之情。誠以公子之勇。用臣爲助。吳可入也。公子報父仇。臣亦少雪妻子之恥。適有心腹人從吳中探事者。歸報要離妻子果焚棄於市。慶忌遂坦然不疑。問要離曰。吾聞吳王任伍子胥爲謀士。伯嚭練兵選將。國中。大治。吾兵微力薄。焉能洩胸中之氣乎。離曰。伯嚭乃無謀之徒。何足爲慮。吳王止一子胥。智勇足備。今亦

與吳王有隙矣。慶忌曰：子胥乃王之恩人，君臣相得，何云有隙？要離曰：公子但知其一，未知其二。子胥所以盡心於闔閭者，欲借兵伐楚，以報父兄之仇耳。今楚平王已死，費無極亦亡，闔閭得位，安其富貴，不思與子胥復仇。臣爲子胥進言，致觸王怒，加臣慘戮。子胥之心，怨吳王明矣。臣之幸脫囚繫，亦賴子胥周旋之力。子胥囑臣曰：此去便見公子，觀其志向何如。若肯爲伍氏復仇，願爲公子內應，以贖窟室同謀之罪。

公子不趁此時發兵向吳。若其君臣復合。公子與臣之仇。俱無再報之日矣。言罷大哭。以頭抵柱。欲自觸死。慶忌止之曰。吾聽子。吾聽子。遂任要離爲心腹。使之訓練士卒。修治舟艦。三月之後。順流而下。欲襲吳國。慶忌與要離同舟。行至中流。後船相離稍遠。不相接屬。要離曰。公子可親坐船頭。督飭舟人。慶忌來至船頭。要離隻手執短矛侍立。忽然江中起一陣怪風。要離轉身立於上風。突然以矛刺慶忌。透入心窩。穿

出背外。慶忌倒提要離。溺其頭於水中。如此三次。乃抱要離置於膝上。顧而笑曰。天下有如此勇士。敢加刃於我。言畢。推要離於膝下。自以手拔矛出。血流如注而死。臨死時。戒左右勿殺要離。以成其名。左右乃釋放要離。要離不肯行。謂左右曰。吾有三不容於世。雖公子有命。吾敢偷生乎。殺妻子而求事吾君。非仁也。爲新君而殺故君之子。非義也。欲成人之事。而致於殘身滅家。非智也。有此三惡。有何面目立於人世。

哉。遂投於江而死。衆人收要離屍體。并慶忌之屍來投吳王闔閭。闔閭大悅。重賞衆人。收於行伍。以公子之禮葬慶忌於王僚之墓側。以上卿之禮葬要離於闔門之外。追贈其妻子。與專諸同立廟。歲時祭祀。以上專諸刺王僚。要離刺慶忌。兩件大事。皆伍子胥一人之謀也。子胥報仇心切。然欲出兵伐楚。必須先除內患。今幸內患已除。則伐楚報仇之事。自可得請於吳王矣。

(終)

上海图书馆藏书



A541 212 0020 8617B



民國六年八月發行  
民國廿一年九月五版



(小小說)

◎ 每冊定價銀五分

編輯者 中華書局

發行者 中華書局

印刷者 中華書局


印刷所 上海靜安寺路哈同路口 中華書局

總發行所 上海棋盤街 中華書局

分發行所 各省中華書局

44063

只圖廿一平式只五頭  
只圖六平八只每本



標商冊註



中華書局  
中華書局  
中華書局  
中華書局  
中華書局

(小  
小  
類)

註冊商標

中華書局  
中華書局  
中華書局  
中華書局  
中華書局  
中華書局  
中華書局  
中華書局

1663920